

INUIT ATAQATIGIIT INATSISARTUNI



UKA2022/Imm. 85

Eqaluk Høegh

Oktobarip 19-at 2022

Uunga siunnersuut:

Innuttaasut peqqinnissaqarfillu akunnerminni tatigeqatigiinnerat
ataqqeqatigiinnerallu annertusarnissaa anguniarlugu atorfillit atuisullu
oqaloqatigiinnerat annertusarnissaa anguniarlugu peqqinnissaqarfinni
immikkoortortaqarfinnilu tamani atuisut siunnersuisooqatigiivinik
pilersitsinissamut periarfissat misissornissai pillugit Naalakkersuisut
peqquneqarnissaanik Inatsisartut aalajangiiffigisassaattut siunnersuut.
Misissuineq aningaasatigut kingunissaanik nassuiaassaaq UKA2023-lu
nallertinnagu tunioraanneqassalluni.

(Inatsisartunut Ilaasortaq Anna Wangenheim, Demokraatit)

Oqaaseqaat:

Qularutigineqarsinnaanngilaq peqqinnissaqarfippu sorpassuartigut
malinnaaniapiloorluni ulluinnarni ilaatigut aamma inissisimammat.

Qularutigineqarsinnaanngilaq piffissami aggersumi – aamma uagut qinikkat –
tassani annertuumik suliassaqluta inissisimagatta. Siunnersuulli matumani
pisarput innuttaasut peqqinnissaqarfimmilu sulisut akornamminni
paaseqatigiinnerunissaat pillugu siunnersuutaammat– tamanna qitiutillugu
oqaaseqaaterput Inuit Ataqatigiinniit sammiveqartissimavarput.

Peqqinnissaqarfippu siunissami pitsanngorsartuassagutsigu - innuttaasut
peqqinnissaqarfimmi qanoq nalaataqartarnerisa paasinissaat
avaqqunneqarsinnaanngilaq. Innuttaasut peqqinnissaqarfiup

INUIT ATAQATIGIIT INATSISARTUNI



ingerlanneqarneranut atatillugu qisuariarfiginninnissamut pisariitsunik periutsinik aamma periarfissaqarnissaat matumani pingaaruteqarpoq.

Nalunaarusiaq 'Kalaallit Nunaanni peqqinnissaqarfik atuisut isaannit isigalugu' 2020-mi saqqummerpoq. Piareersaataasumik misissuinertut nalunaarsiaq aamma taaneqarsimavoq. Misissuinerup ilaatigut naqissuserpaa peqqinnissarfiup iluani atuisunik akuutitsinissamut tunngatillugu innuttaasut pisariaqartikkaat qaninnerusumik – tassa inummiit inummut oqaloqatigiiffiunerusunik – annertusaasoqarnissaanut tunngasoq.

Misissuinermi nalunaarusiaq aqutigalugu qaqilersorneqarsimasut – oqariartuutigineqartullu iliuseqarfigiumallugit – siunnersuuteqartup nammineerluni aamma tunngavilersuutigisaattut – avannaani atuisut siunnersuisooqatigiivinik pilersitsisoqarnikuunera misilittakkallu tassuunakkut atorluarnerisigut – aaqqissuussineq taamaattoq nunarput tamakkerlugu atuisut siunnersuisooqatigiivinik 17-nik pilersitsinikkut periarfissaalernissaa angujumallugu siunnersuuteqarpoq.

Illu-tungaanilu aamma maluginiarparput Naalakkersuisut matumani siunnersuut pineqartoq pillugu akissuteqaataanni - sulisut aalajangersimasut eqqarsaatigalugit – taava siunnersuut una akuerinerisigut allatut ajornartumik paarlattaagallartussanik sulisoqarnissamut pisariaqartitsinerulernermik kinguneqaratarsinnaanera ernuumatigalugu oqariartuuteqarmata. Tamannalu tunngavigalugu Naalakkersuisut allannguutissatut siunnersuuteqarlutik. Soorunami peqqinnissaqarfiup ingerlanneqarnerani innuttaasup katsorsarneqarnissaa qitiulluinnarlugu ingerlarsisoqarnissaa pingaarnerpaajuassasoq Inuit Ataqatigiinniit isumaqarpugut. Allatut oqaatigalugu siunnersuut matumani pisarput taassumunnga innarliinginnissaa qulakkeerniarneqartariaqarpoq.

INUIT ATAQATIGIIT INATSISARTUNI



Inuit Ataqatigiinniit isumaqarpugut siunnersuuteqartup siunertaa sukumiinerusumik ataatsimiitsitaliami susassaqartumi sammineqarluartariaqartoq – naalakkersuisut allannguutissatut siunnersuutaat isummerfigineqannginnerani. Avannaani atuisut siunnersuisooqatigiivinik pilersitsisoqarnikuunerata malitsigisaanik misilittagaalersimasut – kiisalu ulluinnarni peqqinnissaqarfimmi pineqartoq pillugu qanimut suliallit isumaat tusarniaavigalugit ataatsimiitsitaliami suliniaqqinnissatsinnut sakkussaasinnaasunik tuniorarneqarnissarput siunertaralu suliniaqqittoqarnissaa kissaatigaarput.

Taama oqaaseqarluta siunnersuutigineqartoq ataatsimiitsitaliamut susassaqartumut suliassanngortinneqarnissaa innersuussutigaarput.